


∧ 16
2696
12







文稿卷二十七

銘

金尚義墓誌銘

十月七日金君尚義卒于遼陽庚子三  
 月其子祺祐道京師翰林侍講謝君鳴治率諸同年  
 為文寓祭其喪六月祺以喪歸至天津復走京師從  
 順天府經歷薛秉儀來請銘予比與鳴治悲君之死  
 期各為文以慰君地下鳴治既為傳予撮其大者為  
 序及銘君金姓諱忠字尚義處州麗水人乾州知州  
 諱善之曾孫封文林郎監察御史諱叔度之孫雲南

昭和十年  
 一月三日  
 購求

按察僉事致仕諱愷之子今開封府知府致仕尚德之弟少從按察公宦遊廣東甫就學輒棄去商販蘇松間年二十見其兄舉進士復奮就學補雲和縣學生數年應貢升國子生天順壬午舉鄉薦甲申登進士第會修英廟實錄奉詔往應天太平寧國徽州諸府採錄事蹟還簡試御史事于南京丙戌拜貴州道御史未上聞按察公喪歸又喪母高宜人哀毀踰禮庚寅服闋上京師卽上疏陳三事皆人不敢言者復除南京值星變復具疏將上言愈切開封君作東甌童子篇遺之乃止巡盜上江抵南康諸府法尚嚴肅

沿江諸司各置紙牌藉兵尅期更相考覈俾往來江上無虛日盜不敢肆監南京內帑諸衛倉及象馬諸草場吏卒傳相戒曰勿犯金御史攝雲南江西山東三道事劾大臣不任者一人三載考績道得鼻齶至南京移疾不視事因圖爲去計會臺檄遣巡盜蘇松諸府若辭不往都御史胡公敦勸之乃行人謂君法大重執不變有爲君所按者誣君事上奏遂逮捕君君聞命命以妻子屬其友陳御史直夫曰吾不免矣自往就逮入錦衣衛詔獄獄成特命戍遼東三萬衛君談笑就道意慷慨如平時至遼杜門謝客有達官

問所欲君謝曰此正某平生所不敢爲者居六年聞  
開封謝事遣祺歸省病卒時諸子皆不在側家人以  
冠帶服君君已不能言但搖首至再易淡衣乃一頷  
而絕年四十有八君娶周氏生祺及祐卒贈孺人孺  
人卒時君葬諸文林公墓側且自爲壙謂開封及第  
某曰祖壠不耐懼我兄弟之後將日疏矣俞孺人既  
返葬之六年君葬焉卜以某月某日君性剛斷負才  
氣見義無所讓同邑進士吳榮卒貧不能舉君合賻  
治葬又贈所粥田若干畝遺其家貢御史壁道死君  
具棺歛歸其喪南京致賻以行遼有兄弟相仇者君

論弟辟兄及貧急又賙之所著在官有獲天稿三卷  
在遼有東甌童子吟稿三卷廣惠集方一卷藏于家  
初祺方娶十日聞父難亟來赴及君被謫兩上疏乞  
代父戍不得比歸自遼自爲狀述君事甚悉嗚治嘗  
謂予曰尚義有子矣銘曰義以爲塗帥氣以馳視險  
若夷勇不自持謂我好名我職在茲我身弗卹而以  
名爲人才實難必先大節壯哉金君其死不滅

明故正議大夫資治尹工部左侍郎王公墓誌  
銘

工部左侍郎王公歸老衡陽至南京病甚泊上新河

萬曆十年卒于舟中其子恩扶襯歸訃聞上遣官諭祭命有司營葬事進士羅監緝熙實奉部檄入告成事恩寓書緝熙請銘公墓東陽鄉後進辱公禮遇久矣銘曷敢辭按恩所述事狀王氏出吉泰和始祖萬莊從父某守邵陽居衡陽長平鄉遂爲衡陽人曾祖某遷鳳山祖某考諱仕復世有隱德公諱詔字伯宣少警敏讀書目數行下宣德乙卯領鄉薦正統戊戌舉進士奉使雲南大同乙丑授禮科給事中丙寅克韓府册封副使己巳之變與諸科合章劾將臣失律者及敵薄都城公將官軍民壯爲扞禦計事平上疏請

旌死事罰失守及不赴難者時國家多事章奏繁劇動數千百言大要皆扶忠抑佞恤民防敵之務天順初轉兵科給事中給勅命進階從仕郎贈公考妣如其言未幾以內艱去壬午服闋復除禮科奉勅與兵部及監察御史簡十二營官軍遷右給事中成化乙酉代祀北嶽歸遷都給事于時歲屢水旱陳弭災數十事多見采納天城衛指揮王輔甫弱冠邊將遣備寇西郵坐失律當斬公言輔年少不當遣敗非其罪并其屬皆減死丙戌擢通政使司右叅議丁亥奉勅總易州山廠薪炭事興利去弊具有成績己丑擢工

部右侍郎領職如故給誥命進階通議大夫贈祖原  
簡及考皆如其官甲午遷左侍郎入僉部事修內沼  
浚運河修國子監累賜羊酒楮鏹惟運河功最劇特  
遣近臣勞于河上者一于張家灣者再異數也戊戌  
九載秩滿命仍舊職加正二品祿是歲疾尋愈上疏  
乞歸不許己亥城中大水命浚治諸渠道復賜羊酒  
楮鏹疾再作再乞歸上若曰卿慎疾自愛勉修乃職  
其母去公感恩力疾不敢復言歸庚子春方署事忽  
中風尋少愈遂力申前請事下吏部覆實乃許致仕  
令有司給驛傳陞辭賜內餼及楮鏹爲道里費時公

卿而下祖錢都門外侈爲歌詩至溢卷帙觀者皆交  
相嘆羨稱爲盛舉蓋在途閱一月而卒八月十二日  
也壽六十有七公溫厚簡重抱負自許論民情國事  
亶亶不絕窮居事母必曲致歡適喜周卹居憂時值  
歲歉發粟數百石婚葬不舉必爲經畫不俾失所友  
人王布政汝霖卒於官遣其二子爲縣諸生家教尚  
肅嘗取祖考所著家訓三十六條篆諸梓建崇本堂  
歲時會羣族姓講讀其中尤勒戒飭不使預州縣事  
平生所著牋表奏議古文歌詩若干卷藏于家公居  
官儉素常俸外不問生業前後四十年田廬服飾無



增拓歸之日第宅荒落恩奉張淑人舟居周摭館城南以營葬事予聞之緝熙云張有賢行惟恩一子以蔭補國子生質美而文銘曰古有嶽降世豈不神彼龐而竒吾識其人峩冠垂紳在帝之側爲少司空實掌山澤才恢器闕公功亦隆公門巍巍與山爲崇維山出雲雨我中士卒歛厥施寂寞可賂六十七年公歸于山有神不忘公在世間

明故奉政大夫兵部郎中喬君墓誌銘

成化辛丑七月十二日兵部郎中喬君卒于京師吾友中書舍人楊君應寧實君子傳著君狀君子宗字

特詣予請銘辭復請繼以泣竟不得辭按狀君喬姓諱鳳字廷儀大原樂平人也曾祖諱彬曾祖諱鑑歷湯陰平谷二縣簿有惠政俱贈工部右侍郎曾祖妣李祖妣李俱贈淑人考諱毅累官工部右侍郎妣王贈淑人君少穎敏五六歲時侍郎公口授尚書輒成誦終卷稍長落拓有大志從侍郎公使晉藩藩王愛君秀偉欲留爲儀賓君白侍郎公曰丈夫當自樹圖遠大安用此富貴爲公笑曰吾意也事遂止景泰丙子君舉山西鄉薦天順丁丑登進士第時年十九觀政兵部庚辰授武選主事勤慎舉職成化丙戌遷員

外郎未幾丁王淑人憂己丑服闋還官壬辰進郎中  
癸巳丁侍郎公憂丙申服闋改職方職方事加劇凡  
兵利害邊務當可否將材請任弗任朝省諮議時有  
裨益庚子奉使廣西時邊報頗數君重違曹署馳傳  
冒暑雨晨夕倍道不三月而還居一年卒卒之年纔  
四十有三而登科第者二十有四年爲郎中者十年  
官三命不越省吏部嘗擬陟尚寶卿不果欲議爲藩  
貳久不決年資寢淡諸曹正郎無歷君右者竟不及  
再命以卒君素孝養親疾視湯藥夜不解帶喪居哀  
慟前後扶襯還樂平樂平山谷險隘或躬負輻紉塚

雖官治親率傭隸至相爲力庶母高死侍郎公之喪  
君慟視生母旣喪守節白郡縣上狀詔旌爲貞烈之  
門伯父老事之如父兄鸞早世撫其孤憲宣俾齒宦  
籍善交際動無物迂徑直自信不甚爲形迹尤篤故  
舊欵洽傾倒至忘官勢故人無小大賤貴皆樂君爲  
人卒之日皆悼有泣下者予及識侍郎公豐厚和易  
信爲貴人見君翹竦繼出知公福澤攸在比於應寧  
數見宗宇皆謙謹篤問學宇尤穎異年十七舉順天  
鄉薦視君加少又以歎君之澤未艾也君配路氏封  
宜人子五宗縣學生宜以侍郎公恩爲國子生宸案

懷齋集  
皆幼女一聘金吾右衛指揮使曹璽卜用是年某月  
某日葬君長壽山侍郎公兆銘曰貳卿之子爲命大  
夫豈不能治弓而裘箕是圖天肖厥才壽則弗如將  
取之廉而委其有餘已焉哉喬君其澤弗渝

明故封承德郎工部主事徐公墓誌銘

兵部主事徐君源得承德公訃旣爲位哭服服如禮  
將奔喪襄事自著狀序世系行實請予銘按狀公諱  
某字公信姓徐氏蘇之長洲人也居縣東南之瓜涇  
有田甚良祖考華二祖貴三考文質世以農隱故人  
稱瓜涇徐氏公生十有五而喪父父喪之四月弟瑄

始生公籍有世業奉母陳氏及育幼弟雖窮冠履力  
如老成人父嘗教以六書九數之學从益精數法能  
目數行下宣德間詔中使通西洋諸域下州罷節藝  
能士以從公用數爲郡守所薦會英廟卽阼不果行  
周文襄公巡撫南畿諏訪耆俊至無遺策得公喜甚  
凡財賦計出納籌畫皆見咨問公感文襄知己亦竭  
智力爲之一時政事陰惠及民者爲多文襄欲薦用  
公不果後繼文襄者數公以文襄故不替禮接然竟  
無薦者公恒教諸子曰吾雖不仕頗自試然用吾粗  
耳必欲亢宗濟時非仕不可乃留宗子淵幹家盡遺

源及澄業舉子為郡諸生誨勉嚴甚每庭訓知源志嚮喜曰吾子孫當有為清白吏者源舉乙未進士拜工部都水主事分司山東三載考績進階承德郎以其官封公改兵部武庫凡八年于外公前後數十書皆先官誠後家務未卒之一月猶然公平居孝弟處家室白首無忤言治家勤儉凡田廬婚嫁剗制經費必親籍記名公大夫有嘉政善行亦手錄焉及在官尤慎密類為郡縣吏楷武者嗚呼公布衣為時用尚有德惠君子謂一命士可為物濟信夫公生某卒某葬某銘曰身不祿仕材則政謀老獲其名匪我自求

天監寶彰靡功弗酬矧直德者勤思有秋曷以喻公公農者流公有賢嗣出贊國猷澤則弗窮公有餘畱公德不刊我名在丘

樂亭知縣蔣原用墓誌銘

長洲蔣君原用知樂亭縣卒于官其友兵科給事中陳君玉汝為著行狀請予銘曰原用平生欲得先生文今死矣非茲銘無以慰地下且原用配徐涉書史文義惟銘是屬每泣曰妾獨不能如張圓妻乎予嘗識原用于玉汝其亡可念念玉汝言辭至再不忍固也按狀原用姓蔣氏諱廷貴原用其字其先宋禮部

侍郎堂守蘇因居長洲曾祖叔昂祖宗韶父惟清皆  
不仕母趙宋宗室裔也原用七歲失恃繼母鄒鞠鞠  
成之原用數歲能屬對爲韻語未冠通舉子義學易  
于進士奚君元啟游縣學有名成化辛卯舉南畿鄉  
薦爲易魁戊戌舉進士觀政吏部授永平樂亭知縣  
方視事適歲大歉原用亟上疏乞減賦役什六七民  
恃以不徙王師征建州道樂平原用承部使檄總山  
海諸關驛車馬芻食事先令集縣故僻境部使罕至  
治率用苟簡原用舉廢治闕勦不愛力每貳佐出納  
必覓新量吏所具案牘必親校勘越一年凡地里邇

遠民貧富強弱法令便不便皆可掌稽故賦役獄訟  
動皆曲當歲所得常廩費不足則繼以家橐未常苟  
取人信其廉郡使至縣例有饋贈原用執不與或憾  
且謗之不爲動縣治後舊有門吏出入無禁至通饋  
謝原用塞之會疾作不便者諷以陰陽拘忌不聽則  
傳以他說原用曰故令若某某皆死于是以不塞此  
門故邪且人孰無疾疾死命也門何預焉卒不聽疾  
再作再開治益力最後大作乃卒壬寅三月二日也  
原用和厚不忤物外歛圭角理辨內達遇事乃見始  
爲縣或謂其起富室宜不習吏事原用乃奮志倍力

欲自觀其能不幸而死其志亦可哀也原用娶武功伯徐公女爲配生女四人某卒之日徐不能歸玉汝以書屬知永平府姜君璉治後事昇喪西上徐館南郭逆旅一月遺腹得男名之曰壽徐頗自慰忽罹火厄僅以子免原用之幼女死焉玉汝慟不置乃館徐于官邸遣其僕拾餘燼治裝買舟然後歸凡玉汝爲原用謀甚悉君子謂原用交得其人原用先世長洲某鄉某原今歸葬以某月某吉卜也銘曰位不必卿相稱則賢壽不必耄期名則傳爲名進士爲賢令尹吁嗟乎蔣君其死不泯

贈翰林院編修文林郎陳公墓誌銘

吾友翰林侍講陳君師召喪其考耕樂公及妣黃孺人若干年時葬未有銘師召旣登第拜官歸省墓亦不果作蓋慎之也今年秋師召痛先德久弗識乃授狀屬予銘將寓歸用諸壙前狀故按察僉事楊朝重未第時作朝重公戚黨其述事行宜詳東陽師召同官厚且久稔聞厥世銘宜予屬予亦弗敢辭公姓陳氏諱申字崇澄別號耕樂世居莆田涵江系出宋觀察使淬淬與金師戰急子仲剛死父難後淬亦死國事時旌其里爲忠孝坊今綽襖翼然存焉曾祖諱仁

祖諱德考諱光遠並有隱行公貌魁碩動履詳雅讀書曉大義喜談史傳少貧服賈事漁稼爲養時曾祖妣及祖考妣久未葬公痛父志至或忘寢食及父喪益痛自奮積儉爲贏畜乃并舉諸喪皆用禮葬人歎其難奉母林孺人養必備物病左右侍夜假寐榻側聞警欬聲輒蹶起母喪父值忌日執哀如初與弟戊友愛篤至世所遺田宅悉推予之復爲共歲賦俾獲自裕每夢及父母晨興必告弟持抱痛哭以爲常有女兄蚤寡教其孤二人皆底成立鄉居雍孫無競聲忤色人以貧告戚有施疏有貸貸亦薄息或竟以棄

予嘗試長里賦賦不給寧爲埤納不忍爲括克四方  
至日勤館較有遠適貧不能行者必致厚贖值  
承地塗澤輒率衆力治之皆有成績可指數人德之  
至今不衰孺人黃氏世隣也閑禮度習書教孝養舅  
姑視外內族黨有恩誼儉不服統綺見敗縷遺粒必  
歸於之有嘉饌必蓄爲客具及公有義舉雖重費不  
吝助之此於公德固大類教子尤嚴肅不溺私愛恒  
舉近世成敗子迭爲勸戒故師召竟以醇學篤行重  
子時君子謂陳氏有世德焉銘曰龐積薄發在物  
乎彼邇觀者顧爲物病盍觀陳公久乃彌盛時變俗

易趨僞如競公有世守守朴爲正內修外順以聽定  
命天道弗僭自貽伊慶我銘匪誣已俟其定

明故封承德郎戶部主事許公墓誌銘

公姓許氏諱廉字清夫四川眉州人家本鉅族元季  
兵亂譜逸莫可考公考諱容號松屋母韓氏夢五色  
大鳥集于庭生公姿表特異兩目炯然松屋曰果英  
物也三歲時松屋抱適州治慈城下公仰見城廟看  
州二字因以手畫地宛然成畫自是資性朗悟日誦  
數百言屬對響答人摘其奇者以傳身氏驛叔珪嘗  
携入成都遠近聚觀談以詩皆立就稍長通詩書春

秋旁涉百氏尤工書法屢試鄉選不利有司舉賢良  
辭不就遂棄舉子業徜徉山水間著筆山樵隱及渠  
瀾集若干卷蜀人購詞翰者越郡歷邑至屢接戶外  
然公恒自歛視未嘗恃以驕人人益多之公少喪母  
事繼母若所自出惠撫弟妹與人交重意氣不爲崖  
岸蓋非獨葩藻士也正統某年以疾卒某月葬州西  
南飛鳳山之原後若干年以子楫貴封承德郎戶部  
主事公配周氏撫寧知縣鑑之女少閒雅喜讀書撰  
孝經小學列女傳皆成誦孝事舅姑公疾時嘗割股  
和藥以進及公疾革欲以死白志公覺之執其手曰



若俱死柰子女何周泣曰惟命時四子相林梅楫皆幼有諷令業賈為養者周艷然曰非吾夫意也並遣就學後相為崇王府教授霖為國子生梅為固始訓導楫舉進士拜戶部主事周亦以楫貴封太安人太安人就養京師復歸省楫奉使便歸省適太安人病卒丁酉五月八日也年七十有六某月某日合葬葬去京師遠前後皆未有銘戶部君既復官乃持狀徵予銘狀稱公負材不試又蚤世卒時無遺疏皆痛惜不置諸子皆以儒學取官秩戶部尤顯古稱位不稱德有後况無者宜於此取焉是固然哉公生

幾女一適指揮萬壘今閣老公從子也銘曰唐有元賓宋悼夫才而弗壽中道殂韓銘黃詩哀以吁生也無官歿有譽肴山許公華且腴五色雜組雙璫瑤三十七載如朝晡彼造物者榮而枯安用有才如此乎公有四子皆文儒前雖不足後有餘公有遺教非庭趨有賢而慈嚴父如龍蟠鳳山氣盤紆鍾奇闕秀於此俱我銘茲丘世不渝

明故刑部郎中奚君墓誌銘

刑部郎中奚君時亨勘獄瑞州遠至杭州得疾卒按察副使李君若虛方提學浙江日視疾具湯藥比卒

懷麓堂集  
治舍歛衾櫛甚備航君喪歸華亭時君母太安人及妻若子女皆寓京師聞訃慟絕諸寮友皆驚悼相吊尋得若虛書稍相慰曰李君不負時亨吾徒可獨負哉於是屠郎中元勳爲狀周郎中良璧過郎中大濮柳員外拱之諸君屬予銘適君女兒之夫孫鏞者來奉太安人歸自京因寓銘俾刻石內君墓壙予辱君還往且聞諸元勳及馮郎中佩之知君賢爲詳乃序而銘之君諱吳字時亨姓奚氏世爲松江華亭人質貌穎異九歲就外傳囊白金爲學資有婦人道哭問之曰家貧鬻絲得百錢而遣之舅姑老無用爲饘粥

具君卽以所持金子之歸白承德公公曰兒能如是吾無憂矣君弱冠從承德公于合公疾君刺血顰天求以身代又重傷太安人心匿不使聞公卒君奉母扶襯歸廬墓終喪籍府學爲弟子員舉成化戊子鄉薦連擢己丑進士第循例歸省壬辰拜刑部主事明敏精吏法片言擿伏人服其能遷員外郎勘貴州獄歸奏稱旨進郎中庚子伏乞歸省太安人遂就養焉居數月會瑞獄作事尤劇君受命往日奔走勞瘁成疾以卒壬寅三月望日也年三十六娶潘氏封安人子一曰伸女四皆在室君和厚易直重恩義幼學時

母析貲予之君悉讓兄冕俸所得金帛必分族屬爲員外時同年董知縣失官道遇寇貧甚君爲館穀給緜纈厚贐之還使經景州有故寮劉判官死五年不舉君葬之且卹其家平居恭孫見鄉先輩無窮達皆不敢慢處寮案終日不色忤故人多愛樂之尤嗜問學寒暑不時輟喜臨晉唐書爲詩文徃徃有竒思與客賦詠值意得恒夜分不寢有干東稿若干卷藏于家君墓在某山葬用是歲某月某日從吉卜也銘曰利劍劘發其聲有劃儵歸大津光彩滅沒孰爾淬之復爾閱之鬼神有靈百世其衛之

一朴居士蔡公墓誌銘

進士蔡君清得告歸晉江念其大父居士公未葬葬且迫介喬進士字請予銘自述祖業甚悉曰清不敢誣吾祖也清有文學名觀其辭核而理乃據以銘公姓蔡氏諱潤字懋德以字行號一朴居士先世譜逸不可考元有諱謙者於公爲高祖居泉之惠安祖諱惠至正間避亂泉城婿于晉江朱氏始爲晉江人考諱輝國朝永樂間舉貢士母林氏公少失怙家貧甚門戶幾落公奮自樹拔與其配林氏備嘗艱苦銖累寸積積稍裕及母棄養諸弟妹皆壯長力爲婚嫁弟

懋敬病且死舉財物契券及其遺孤屬公公治後事撫其孤長則悉舉故所屬者歸之嘗曰吾不能顯吾親期不辱吾不能庇覆吾兄弟亦盡吾力而已矣年五十外內事悉付二子惟課孫讀書督僮僕治樹藝暇則匡坐一室非大賓客及鄉飲禮請未嘗出戶閭雖居闔閭間有不知其公者公重先祀昧爽謁祠堂已乃出治事久復謁始就寢祭必備物或病弗克與則飭子弟惟謹身以勤教孫清出就傅且必問曰清入塾未未則戒之曰汝貧家子不可作富貴相見其字畫不楷則曰是亦學也柰何不敬凡器物或損壞

未嘗介意獨於書甚愛護每戒子孫曰吾於此雖不甚解然聖賢所著要不可蔑視且吾先世遺物惟此耳汝輩慎守之見子孫爲服爲新製輒蹙然曰何得效俗兒女子態也公性謹飭不喜博奕戲劇事質不外飭嘗曰吾無他技能惟一朴耳其所自號以此公旣不試志業無所見故其言傳爲多郡縣吏雖不時見然知公賢恒曰使吾民皆蔡某官府無事矣按察僉事林吾克賢恒下郡縣詢行義命泉州知府沈海書公名榜于旌善亭云公卒于成化某年某歲葬潯美山壽七十六配林爲山陽教諭廣之女子三長觀

慧清父也次某某孫四曾孫一存畏銘曰善不必大  
惟實則有節不必奇庸乃可久曲士詭行嗇夫利口  
勞身徇名為祿之誘若罝斯獵若戈斯取旋棄所執  
若視芻狗嗟今之人固也誰咎朴哉蔡公有順無揉  
外無顯名內省奚疚公心則寧公死不朽

懷麓堂文稿卷二十八

誌銘

明故征西將軍鎮守寧夏後軍都督僉事周公  
墓誌銘

公諱璽字廷玉姓周氏其先本永平遷安人伯祖亨  
洪武初內附授燕山護衛指揮使賜田宅因家東安  
祖斌永樂間以靖難功當擢都督讓于兄或考諱英  
宣德間坐累謫戍開平衛累功擢都指揮同知寄祿  
府軍前衛成化丙戌以老謝事公代為指揮使辛卯  
征北邊以功擢署都指揮僉事用薦領十二營號令

尋統五軍右掖戊戌勅充右叅將分守陽和庚子與威寧海功進都督揮同知調大同副總兵辛丑以黑山墩功進都指揮使壬寅以黑石崖功署都督僉事癸卯北邊亦思馬因大舉入寇分兵三千守懷仁賊逼夏米莊中軍失利公還兵內援夜忽值賊營時賊乘勝勢甚銳公大呼屬將士曰今日之事有進無退退則無遺類矣衆爭奮無不一當百銳弩齊發呼聲震天地賊少却良久復突入短兵接公臂中流矢令左右拔其簇督戰益急與其子鵬及死士數輩斬獲十餘級會遊擊將軍劉寧兵至合爲一營中軍潰卒

多來歸兵勢乃振賊旣退失律者皆得罪錄公功進都督僉事甲辰改充總兵官鎮代州兼督鴈門三關弘治戊申移鎮陝西庚戌命充總兵官佩征西將軍印鎮寧夏甫一歲設修邊備爲遠久計偶得疾召諸子曰吾生後佩印分闔分已足無所復望獨未嘗大破北邊爲朝廷報抱恨死矣氣就絕忽大呼曰好殺好殺遂瞑是爲辛亥七月十五日年止四十有二生子四長鳳蚤卒次鵬以從征功累官錦衣衛指揮僉事次鴻次鶴公醇雅有禮度中亦負氣蒞事斬斬尤精騎射知兵習戰近時論邊將者必指屈焉奉二親

謹甚迎養大同比喪遣諸子還葬都城東今所祔墓是也其名曰魏村社之原子雅聞公賢公之卒錦衣衛指揮同知劉公彥芳持狀爲徵銘予又聞鳳卒時其妻都督王君賓之女號泣不食死詔旌所居曰貞烈之門公之風又于是乎在銘曰漢出雲中動以萬騎公兵三千力折胡勢宋睨西夏屹爲外虞公提全軍坐鎮強胡惟公才賢適際斯盛以守則固以戰則勝惟天子聖俾我兵是競惟古將才必鍊乃成公在三陟久益有聲天弗假年疇不與戚曰此豈易得而奪之亟有歸東原公歸其間公靈在邇爲河爲山偉

諡公名雖死其勿諉

朝邑縣學訓導致仕張公墓誌銘

成化乙巳夏六月二十二日朝邑縣學訓導致仕張公卒于澤州自甲辰之秋山西大饑人相食餓莩蔽野歷冬及春厲氣交作死者復相繼時公年已七十有二其卒也亦以厲云嗚呼傷哉公諱翔字騰遠世爲澤人考諱某母宋氏公生而聰慧果毅工書善記誦未嘗色惰事親志養產不踰中人而奉養必備親疾必憂形于色奉三兄謹甚不命之坐則侍立終日

懷齋集  
家中析公所取田廬未嘗有所擇兄泰夫婦繼卒以遺孤屬公公撫若已出爲娶婦至長子孫不使異產父喪嘗市木爲棺而通其直偶行雪中躡得一物視之乃白金一錠求其主不得遂酬木直鄉人異之曰此孝徵也凡喪具服制皆用考亭禮以至于冠昏交際皆然公以詩舉于鄉屢不利以例貢禮部始授學職至朝邑歎其學政久弛身先訓率必敦本實次及文藝亦嚴立程格終始不變於是科第踵接九載有成績當陞以老乞歸家居惟課子孫讀書史申明孝弟間以訓鄉後進勸善戒惡其言悃悃懇到聞者悅

服皆稱爲鄉先生焉公嘗慕薛文清公之學遣子澤就學河津舉進士知武安縣實就養教以官事澤以廉能著政譽徵入爲河南道監察御史蓋父師之教爲多公子三長澤次漢次某初張氏墓在河西金岡嶺今卜遷于州城郝家莊之原以是年某月某日葬御史君奔喪將歸介其鄰武學生徐君鏞來購銘予聞御史賢按所自著狀得公行且悼其值時厲以死雖壽宜傷也蓋於是溪有感焉乃作公銘銘曰生也逢時壽考且康老不逢年卒以疾終古有養老于鄉于庠國典具存而公則亡吁嗟乎張公



焦生邦重墓誌銘

焦生瑾字邦重侍講學士守靜先生孟陽子也卒于京師先生哭之慟至忘食寢予先生同年友義均兄弟聞生死悼歎不能置與諸同年爲文弔之及歸葬泌陽先生自書其性行歲月授予屬銘予尚忍辭哉生始名恩榮蓋先生舉進士爲翰林庶吉士生京師報至家時有司方建綽楔榜曰恩榮先生之父封編修公遂以名旣長乃更今名生四歲喪其母呂孺人先生以編修歸省實攜生以從旣還朝公及祖母某孺人留不遣七歲病癖藥之愈公令羣兒嬉聚以

悅生生每凝坐不一視公異之稍長授以詩書不數過輒成誦公曰此可教也遣其兄琦携致京師就外傳沉默自持雖師友問答不過數語先生疑以爲鈍及考所業則未嘗不通平居言若不能出口及誦書史見古人事行試令辨曲直賢不肖時當人意爲舉子義輒合渠度書字亦清勁同學者皆自謂不及不妄取予不濫與人接嘗謂其弟黃中曰吾見同游有狡詐者彼自謂得計詐豈能欺人徒召憎耳汝資性過我但恐爲此輩所移易汝其戒之嘗侍先生獲觀程明道秋日詩邵康節大易吟退書之几格反覆諷

懷齋室集  
誦若有所得也生嗜學欲速就積勞成疾見其父憂  
形于色輒強顏慰之曰兒病行愈大人幸盡心職務  
勿以兒爲念踰年益憊先生謂曰兒脫不諱俟汝兄  
兄有二子者爲汝繼不殄汝後生但飲泣其繼母郭  
及兄瑞問之皆不答私謂其姑曰我無他囑但勸我  
父勿哭我也成化乙巳六月二日卒年二十有一聘  
胡氏縣學生繼之女待年久之竟未及娶以死予同  
年家子弟若侍講東瀧彭先生子彬方石謝先生子  
興仁今南京太常少卿愧齋先生子罕皆敏而早卒  
予連喪二弟山川慟而成疾故于生感之尤深嗚呼

吾又忍銘哉銘曰嗚呼焦生胡質斯弱而志斯強踴  
躍振迅僮起而莫之撓也稼未穫而稿樹未實而傾  
天寶摧之豈人弗能吾爲汝銘以釋汝靈以慰汝父  
兄嗚呼焦生

明故文林郎河南道監察御史李君士常墓誌  
銘

成化乙巳春三月士常以御史巡河南東陽與倪學  
士舜咨諸公出餞城西僧舍士常意眷眷不忍別冬  
十月間巡撫都御史報則士常已不起矣東陽與舜  
咨驚愕相吊旣又與姻友潘時周會哭以書訃其兄

士儀士儀悲慟欲絕遣弟繕及從子穆迎喪遣子稷來告哀徵銘東陽得書哭失聲及喪歸道京師寓諸郊數日東陽與諸友往哭奠之乃爲銘畀穆歸俾葬焉嗚呼吾忍銘士常哉士常姓李氏諱經別號力齋其先鳳陽臨淮人也曾祖諱濟元季以鄉兵歸國累功授廣信衛正千戶祖諱庸陝西都指揮僉事考諱徵萬全都指揮僉事始居萬全兄士章署都指揮僉事世有勳望士常幼端重如老成人爲都司學生刻志問學夜或睡輒以手自批其額頰舜咨父尚書公謫戍萬全士常寔受學有名諸生間葉文莊公爲巡

撫賞愛特厚薦于我外舅蒙泉岳公爲婿公時知興化府得葉書曰與中不吾負亟報許之士常游蒙泉門久學益進御史林貴實閻子與督學政咸見器許甲午舉鄉貢戊戌登進士第奉詔入翰林爲庶吉士辛丑拜河南道御史奉勅巡山海諸關二年政令明肅歸掌道事覈京官稱負尤嚴慎不苟及巡河南令有司毋貸市物而稽其直聞者皆相戒莫敢肆時歲大凶上疏言懷慶諸府民父食子兄食弟骨肉親黨相噬死徙十六七雖蒙赦宥宜大肆蠲卹庶他變可彌又與巡撫會議諸賑卹事未及報益憂懣簿訟填

懷麓堂集  
委弗違寢食冒暑至洛陽疾作復有公事當詣汴猶  
閱案過夜分乃行至則益甚語已不可辨猶隱隱言  
採荒事九月二十一日卒屬纊時巡撫及布政按察  
諸公皆臨視知開封府張九雲治舍歛棺槨官給驛  
傳復遣使護送以歸十二月二十九日葬泡沙原祖  
塋之右士常天姓孝友又習世訓居喪蔬食三年兄  
弟雍穆晝聚處堂上暮乃歸寢兄出未返過期不敢  
飯閨壺和敬迭爲賓禮叔母寡而守節終身母事  
兄士章子指揮同知稽及穆及兄純子程秀皆早孤  
視若已出或親爲講授繕庶弟也遺腹于外及長謀

歸之爲娶婦焉士常赴義如渴勇不計力人有善推  
誠嚮慕意氣所屬歷歷出肝肺守官清儉家指旣衆  
俸不給或稱貸爲日夕計及遇文人墨客竟日延款  
與相倡和所得詩賦至累篋笥猶酷好不厭自出翰  
林爲御史雖極通要而非其好竟憂勞以死嗚呼悲  
哉士常娶于岳賢而早卒封孺人繼娶王爲卽墨知  
縣時佐之從女封孺人生三子秩和穉皆幼士常善  
楷書恒曰吾兄書法過我謂士儀士儀乃自書此銘  
曰以慰吾弟東陽爲篆益亦士常意云銘曰官高任  
艱君子之憂曰貴曰富匪我攸謀彼籍勢者爲身爲

家官而已矣。遑卹其他。君居御史，不樂其華。我職弗  
遑而暇，爲夸孝廉儉勤。君行則有歛焉，弗張君子之  
守迪而獲咎。豈理之常人則何尤。悠悠彼蒼，我銘士  
常百世不忘。

封宜人喬母路氏墓誌銘

兵部郎中喬君廷儀，旣葬樂平長壽山。越七年，成化  
丁未七月六日，君配宜人路氏卒于京師。故第子宗  
宇輩扶柩歸，卜明年正月某日啟窆，而耐以予嘗著  
君銘，知族系家範，頗悉請誌耐事。及宜人懿行，庶有  
所互見者，嗚呼！先君之殯也，宗昆弟慰我，相我意勤。

甚今日之事，予惡得無情哉！乃強援筆爲誌。及銘路  
與喬同出樂平族，故望宜人營膳所，丞仲室女在襁  
褓間，爲怨家所毒，幾死。母孫禱于神而甦，因異之。少  
精女事，通孝經，列女傳諸大義，未笄有縣令主其家  
從者亡金五十兩，懼欲自引決。宜人偶得諸后，圖白  
其母還之。郎中君從厥考工部侍郎公試京師，營繕  
重其秀，且文遂受聘焉。旣歸，晨夕饋食，湯藥暨諸時  
祭，皆精洗有度。事姑王淑人及庶姑高烈婦，懽曲承  
順，善成其懽。郎中君肄舉子身，以勤相，夜夜鼓始休  
漏未盡，必夙興以待。比舉進士官兵部，封安人。又進

封宜人雖寢貴服用皆故物從子憲宣失怙恃撫之有恩宗宇幼手教字畫稍長遣就業每嚴誨戒及字舉進士授禮部主事戒加切每朝有吉禮字典儀制例得賜幣宜人必歛容曰此君賜也宜人何修以報宇將造朝必起坐詢早莫出乃就寢故宗宇皆有名士大夫間自侍郎公以下三喪宜人皆歸治葬已復就養益綜家務雖無贏貲食指數百皆受給處側室陳甯三十年畧不爲形跡至同食飲視庶子宜宸容未始有異侍郎公當廢國子生宗以長以讓宜宜人喜曰兒能爾固善尤樂施予族姑子張戎貧不能娶

給以金帛永清馮德成者有急質女求貸貸之金并其女歸之從子僕劉溫廢疾被出宜人憫其窮爲之娶而遣之聞其籠焉于市者粥而縱之以爲常其多至數千焉平居溫厚容忍簡言咲婢僕輩未嘗見喜愠色戚黨女婦凡一接無不意滿卒之日多感慕泣下曰今安復有如喬宜人者邪銘曰有夫克肖婦佐之孝有子如夫維母之撫從人者艱實恃以久爲所從助乃謂能婦亦謂能母生從厥居死從厥封我銘郎中繼銘宜人以備始終

封宜人朱母黃氏墓誌銘

子少與崑山朱儀中交甚厚獲拜其父奉直公及母黃宜人宜人之喪儀中將覲自大原未行得訃至京師乃自述事狀請予銘曰以此累吾友也是宜銘宜人之先蘇之長洲人處士仲光之女朱在隣邑族相望又俱籍京衛故宜人歸于公宜人事舅姑甚謹凡侍疾居喪如居官省時家寢饒食指益衆相公蠱幹雖澣衣敝物不忍棄睦處姊姒均視羣從翁無間言下逮臧獲小有過務掩覆之皆飲德焉儀中始自黷塾歸宜人必詰所業視勤惰爲憂喜比舉進士官兵部教使清白奉職以承父訓日勤勤不置以主事貴

封安人以員外郎進封宜人儀中爲郎中坐累謫常德同知改知德慶又內徙同知太原道京師乃請就養宜人不肯行又閱歲而卒距儀中至僅兩月耳儀中痛身在遠貽其母之思以沒且弗及含歛曰吾乃以此累吾父也復念其兄縉在蘇尚未歸又數月乃葬蓋宜人卒以某年葬以某日其地在城南十里河之原舊以族葬地且陋乃闢其旁遷壙其中而右虛焉禮也銘曰有子翹矣愛亦勞矣養弗酬矣嗟無繇矣訓則勿違行則勿隳維子斯才以成母儀維宜人

華編修伯瞻墓誌銘

嗚呼伯瞻乃止是耶伯瞻質偉氣充才勃勃不可遏其志所期甚遠且大舉進士財三年官一命年二十有四而止悲夫初伯瞻從其父廷佐君居京師時未冠學于楊邃菴應寧與大原喬字希大並價予見伯瞻書勢已逼人私喜吾湖南後來之傑蓋其在此及伯瞻舉鄉試第一連得進士入翰林爲庶吉士汪寅軒傳體齋二公奉詔授業大見甄賞每閣試與稿城石瑄邦彥相甲乙授官爲編修予又喜曰此天所以玉其成也予與廷佐君同鄉又邃菴知己友故伯瞻

視我厚至是又同晉日益密每有作未始不出見見輒加進一二載間遂脫舉子習得古人蹊徑詞簡意達粲然成章予嘗以聞諸劉文安公者告之謂爲文必先博而後約收歛大早則其地無所容伯瞻以爲然然執不變意者天將速其成故使至是哉使天果有意焉則斯人者胡不姑涵育長養俾大有所就之爲愈也予益以慨人之才不易得且不易成也悲夫今年春廷佐君以常州知府入覲歸伯瞻已病秋益劇臥不見客予數往乃疆見之恠其神藹然比得告猶函一卷具書致予曰巒且別願得手書數通以歸



書未成而訃報予既往哭之念無以慰其志者乃據邦彥所著狀爲銘屬希大書而刻之又自書于卷中以昇其家藏焉償舊諾也伯瞻姓華氏巒其名世居蘄州以州學生舉生成化某年卒弘治某年葬于州之某原娶王氏子女各一人皆幼銘曰吾黨得之吾曹得之而遽失之吁天誰詰之

奉議大夫刑部郎中何君墓誌銘

君姓何氏諱說字商臣世爲郴州人祖諱義堅合州同知贈戶部主事父廷彥雲貴提學按察司僉事君少從按察公遊學京師赴湖廣試御史樊君英奇之

君性折且盡得其名謂衆曰此不可使小就寧勿取後數年成化庚子果得解元連擢辛丑進士第久之授刑部主事侍郎建昌何公嘗監試湖廣雅器君見所屬獄案曰吾謂子文士耳乃能是也嘗勘獄順義有兩豪爭地事涉中貴人剖析無所避遷員外郎時何公爲尚書公總諸司奏牘校閱精敏山西有亂民御史以謀反奏獄且具君閱卷曰反罪當孥此不過假佛惑衆雖潛表通胡不果至乃謀叛叛止死耳竟用其議活數十百人及遷郎中階奉議大夫嘗奉勅錄囚南畿凡錄六千人上讞三千餘疏多所平反楊

州有毒藥殺人獄君析其疑數端果還人有隙者所  
搆奏釋之廣德有饑民貸谷不得而羣奪之者連四  
百餘人皆坐死君矜其情許自首使償谷且杖遣之  
皆泣拜而去歡動州境還朝名愈彰莆田彭公爲尚  
書益重之旁攝他司事鉅細無弗集者弘治癸丑刑  
部災君坐本司下都察院獄詔降一等補外君在獄  
已沾疾得命出一日未調而卒惟其子進士孟春在  
側大夫士聞者皆悼君賢弗克壽且竒孟春才哀其  
摧毀骨立又貧甚貸而將事右諭德劉君道亨爲著  
君狀孟春子禮部主舉以君沾命且受學焉哭告子

曰微先生孰可屬吾父者嗚呼子安用爲君慰哉君  
父按察公舉己丑進士累階奉政大夫致仕以恩加  
修正庶尹子二其次孟旦女一君年四十有三卒于  
某日卜用是年某月日葬某山之原君清謹重厚不  
訐人過遇事有力母喪廬墓有芝生于旁人以爲孝  
感云銘曰惟湖南地三世進士自何氏始亦云竒事  
家用易學受父授子科必丑歲歲必周紀君舉在辛  
先己後癸君獨中阨如澤斯沛孰停其原孰導其委  
天實爲之請究終始

明故兩淮都轉運鹽使司知事周君墓誌銘

君姓周氏諱澄字原潔其先自道州徙巴陵塘源居數世曾祖諱國才祖諱桂芳考諱思恭妣傅氏生四子君其長生有奇質受書鄉塾兼通法律有用世志未遂也湖廣布政使司嘗缺知印知印者主印記出入役雖勤不與諸從事伍君以名爲府縣所薦黽勉就役而非其好有爲布政者雅器許之或譏以政務亦稍稍自見授廣州府倉大使當藩臬交會出納繁夥勤會計愼勾稽宿姦歛手不得肆則相扇爲浮詞構以罪按察分司不能直君具疏懇諸朝下御史按察姦狀事乃白秩滿丁內艱服闋遷浙江上虞縣主

簿地衝要多賦訟君以習律故皆剖析得理使有大獄久不決則以委之嘗攝餘姚縣事餘姚故接境民聞君至輒相率共賦役不督而辦叅政何宜檄領京儲兌運事舊時悍卒多怙力侮民民代補耗虧爲所困君悉意規畫益嚴爲約軍民皆稱便何嘗與論水利至夜分不寐嘆曰能官也浙東海溢上虞尤甚工部侍郎李公顒築堤海上君承檄受任與有勞効九載將去父老合詞請留于御史及布政按察例以未報政不許比上吏部考入優格復丁外艱服闋擢兩淮都轉運鹽使司知事署泰州及淮安二府分司

兼掣淮安鹽貨嘗攝篆事事皆集諸場戶白于都御史張公瓚再被獎諭聲益振然亦坐劬瘁得疾成化癸卯八月翔卒于官年五十有九有司用例具舟歸其喪乙巳某月某日葬珠冠山先塋之次娶某氏子四長質次貴次賢次賓君葬未有銘貴在京師聞母喪將歸地陝不合葬畝別爲銘內君墓乃奉柳貢士大綸所著狀介李貢士永敷以請于予嗚呼今之人或負才挾智位小不稱志已不屑致力或躡重泥遠名浮而實喪雖貴且顯亦奚以爲哉君歷三職二十年官不過八品矻矻窮日夜竟以勤死計其所克濟亦已多矣是可錄爲有職者勸銘曰匪甲科是塗而辟于蕃弗正寢是終而死于官然則生距非榮而死寧弗安後五年而得吾銘庶以爲永觀乎

懷麓堂文稿卷二十九

誌銘

退菴處士趙公墓誌銘

予舊居西涯與退菴趙翁同里開先公年與相若時  
歲相還往既遷城西時念之翁以其子永學於予  
先公實見命焉先公之喪翁每爲助夫經理諸葬事  
不厭纖悉且爲相吉壤適厥先墓曰庶幾他日相從  
於地下也予用是念之不忘嗚呼孰謂翁亦棄我去  
耶翁本臨淮武家祖仲良以伯父勝貴贈明威將軍  
長陵衛指揮同知考諱雲從兄於官遂爲京師人翁

懷麓堂集  
失怙與兄某承奉母賀氏以居甫弱冠輒共任家政  
遠涉湖海爲陶倚術旣負藝識儕類歸服家日裕視  
兄爲多兄卒禮事寡嫂婚從子三人一人爲僧別構  
菴居之獨念得嗣晚義給貧困折券棄貴將爲後地  
踰年而永生又數年後得子杲翁曰永也敏可使就  
學俾事舉子業將用儒顯蓋於此有遺望焉病且革  
強執予手意有所屬也將屬續其家問之曰得無念  
永乎乃泫然隕涕而絕方予之未至也以所名子通  
沾賈事頤指手授克獲其力人亦以見公之能云翁  
初娶吳氏生女四人適某某繼娶胡氏生永杲及二

女適某某翁生某卒某壽七十六墓在都城西北傅  
家庄之原舊以族葬吳窆其右方至是永杲啟窆內  
公柩祔以吳而半虛焉旣得卜於某日永號泣請曰  
非先生銘孰以慰吾父者乃爲敘及銘銘曰吾父之  
葬實鄰翁墟吾神不孤翁與爲徒翁生我娛翁死我  
吁我情所於銘其舍諸曷其訪翁墓祀之餘

喻孝婦墓誌銘

有服衰杖桐乞爲其母氏銘者介指揮張文仲以請  
予辭曰女德類弗著勉爲之非吾意也張曰茲有孝  
行其諸異乎世之爲婦者敢因以請問其姓名則吾

友司務喻以正之兄以善之子心固已許之誦其狀  
爲訓道仇東之所著蓋喻氏一孝婦也因嘆曰嗟乎  
近乃有斯人哉世之稱爲子者尚不克自致於親况  
婦姑哉誠有是雖不吾請吾固將傳之按孝婦姓王  
氏諱真其先出浙之仁和永樂間徙實京師爲順天  
大興人考諱貴母陳氏喻本南昌望族以尺籍隸京  
以善其少也方擇配孝婦歸焉事姑韓謹甚韓嘗病  
亟藥弗效孝婦計無所出瞿然曰嘗聞老醫言人肉  
療竒疾非此不可卽潛入幃中剪左股肉爲糜以進  
韓食已爽然而甦曰吾已分死不救何醒之亟也孝

婦匿不言韓察其有痛狀詢家人得之泣曰新婦乃  
至此乎天道亦甚邇願新婦他日得婦如新婦也鄰  
黨嘆息或爲泣下以善以內行不自暴有司者莫能  
旌之然人多稱爲喻孝婦云孝婦年六十三卒某日  
葬大興東郊下馬社先塋之次子一日春嘗捐貲給  
邊授階七品孫一初孝婦之嫁也喻業中落以善始  
起廢成裕孝婦稱內政實與有力及富不妄費一錢  
惟享祀必洗腆撫臧獲務俾飽煖無怨言此其餘事  
云銘曰昔有崔婦登堂乳姑姑視吾婦汝報不孤喻  
婦實難彼崔弗如彼以其力我以吾軀惟天弗誣有

子克家有狀足徵我銘匪誇

明故封大中大夫陝西布政司左叅政梁公墓

誌銘

崞爲縣在代州邊地多武尚鮮有以儒顯者自直軒  
梁公以子景貴封徵仕郎兵科給事中再封大中  
夫陝西右叅政其配某累封至淑人及見其子爲都  
御史鄉有識者皆感奮曰賢哉梁公乃以子致貴如  
此皆遣子弟就儒業多至若干人比公卒無大小疏  
戚皆會弔齋咨涕淚以爲公實啟我今不可作矣時  
都憲公方承勅巡撫湖廣歸奏於朝計喪事期迫不

克久滯都邑預囑其甥丁戶部紳請予銘刻石公  
資字叔敬直軒其別號也曾祖某祖某考某皆儒  
於農公通六藝能爲五七言近體詩每見前輩格言  
善行必興慨慕恒嘆後進士曰讀書不求實踐猶不  
讀也性質直無他嗜口不談勢利尤不信釋老喪家  
有問禮者輒云佛老法語人過及改悔則又爲獎振  
之故雖被斥責亦不爲憾且賴以自直達官貴人多  
折位勢爲禮貌若都御史李公祝秦公縉每詢兵農  
政務語必移日而一不及私二公退曰梁光生吾之  
石洪溫造也諫不能言口授以詩輒成誦知非凡子



傳舉進士竟以是成其在兵科爲給事中戒以清慎始賜錫命爲叅政益舉職左都御史余公子俊而下階旌之吏部下御史覆實命始再錫副都御史雖要顯秩不過三品錫不改命然鄉之人皆以都憲視尊之無異詞公益遜避若未始有者蓋終其身不與進尤嗜義媼戚婚葬視力爲給旁及鄰里多欲惠歌澤焉壽八十有三忽疾革召子孫具湯沐潔衣曰吾今日稍倦殆將歸矣問以後事不答越明日乃逝是爲某年月日配史氏賢而同封累號曰淑人先公卒子二長以義官璟其次也孫五枋梓及某某曾孫七派

人於某原公卒之年某月某日啟窆而定以淑人稱嗚呼古者文質並用乃稱君子世降俗薄識者病之梁公以經學顯實由父教都憲尹敦雅不浮慎守恒執不爲勢位所移易其於家訓蓋有徵焉公其賢哉生有譽望沒有銘誌以貽後人非侈也銘曰梁望西徽顯於封君維君有封維子有勤我邇求之由枝逮根越三世以降種德以芸久乃有獲自貽厥身屹屹西亭位隆望尊彼稗與莠曾何足與倫我最其德以刻銘之

明故鎮國將軍都指揮同知王公墓誌銘

王氏出鳳陽穎上爲世族元山東行省右丞榮入國朝內附洪武初授神萊衛百戶遷密雲中衛副千戶子禮嗣從太宗靖難遷指揮僉事子宣嗣實生公諱榮字士華五歲而孤正統改元嗣指揮僉事署衛政分領邊伍名漸著天順壬午用薦承勅鎮密雲古北口諸路公申號令利械器閱實兵旅分前後次日嚴備守憲廟卽作賜白彩幣敵入寇公出龍王谷追三百里俘男婦八人斬首九級捷聞擢署都指揮僉事所統官軍士賜官賞有差成化癸巳敵甫入公出大

獲追敵古北口三百餘里斬首十七級歸所掠牛羊以百類遷都指揮同知躬閱要害置窖窩弓釘盤諸器賊近輒受窘以去其所鎮地西東五百里長城萬餘丈皆壘石爲之水至輒敗修築無寧歲公煉爲石灰填土爲甃重治之城因不圯復以地廣難備請移闕東北姜毛谷諸隘地增城堡遠斥堠前後至二十五年境內罕謐朝議偉之會有嫉公者媒孽其短遂謝事居五年卒弘治某年月日也壽六十葬城東五里原先墓予聞邊將與大將異才而所處亦異宜公所負抱無愧所謂邊將者用不競施而滿見沮厄豈

不惜哉公娶夫人孟氏繼夫人朱氏子五人某某孫  
三人某光祿典簿李君廷器爲勳請銘自爲著行狀  
并道其終始之概如此銘曰關城騷騷爲國東嚴屹  
屹王公手扼其隘胡至輒退我擊其背彼旣失勢莫  
我敢肆孰能挫公敵不在外公不自媿曰我寧退官  
我自取亦復我棄孰謂公棄公澤在世

楊君丁宜人合葬墓誌銘

吏部右侍郎楊君文懿之配宜人丁氏扶公喪歸鄞  
朝廷方遣官治葬宜人亦卒其子按察副使茂元任  
湖廣合葬於堂洞山之原公行旣有銘而宜人事未

及載茂元乃具書請於公弟翰林侍講惟立適不置  
予以公故不敢辭宜人公同縣人也父諱瑄正統間  
舉鄉薦未仕而卒時宜人甫四歲從母樓育於縣南  
王氏王氏翁諱宗遂頗讀書尚義氣見宜人夙端慤  
不苟嘗笑口授孝經小學慎爲擇對公以諸生赴試  
間過翁翁與語驚曰此名世才也遂以宜人歸之宜  
人出富家而楊氏世素儒食指數百藜藿苦弗繼宜  
人脫簪珥躬織作以佐養且給公游學費雖涉疲悴  
了無懟色人以爲難景泰庚午公發解浙江明年舉  
進士以翰林庶吉士丁父憂連遭大父母喪宜人承

公意治後事甚備事姑張夫人寒暑不易節見稱孝婦既闋服從公於官天順壬午以編修貴封孺人迎張張弗至每製新衣及致珍味封襲以歸成也戊子從公歸覲日具冠帔自堂下上食及治葬如喪舅時已亥以侍講學士貴拜宜人命及公遷少詹事始得通籍中禁預兩宮朝賀屢荷錫賚公爲吏部二子及諸弟皆舉進士布列京署家極顯宜人猶勤內政躬課諸婦習女事每客至庭戶輒聞織紡聲家人勸少休則曰我固樂此且以爲子孫法耳蓋至於老不變耳弘治某年月抵家以積憂成疾某日卒壽六十有

四少公一歲三子茂元其長乙未進士累今官次茂貞早世次茂仁丁未進士刑部主事皆有文孫七女孫三某月日合葬焉嗚呼文懿公以家學名天下其子姓羣從蒙養壯習皆是物也及其漸積涵洽以底於大成豈獨庭訓固亦有內則哉是宜銘宜人之德以爲公補銘曰暮暮溪閨左書右詩爲女中師嚴嚴廟宇朝鏘暮呂爲大夫宗婦少而劬劬老而於我儉我勤孰我武渝以迪以遺皆夫君之餘其餘伊何台爾鼎爾我力弗旣庶其在此雖復有此惟夫君是似夫君是似我死其無媿

封孺人張母姚氏墓誌銘

都察院右副都御史張公敷華以湖廣布政使拜巡撫山西之命歸安福省母姚孺人至黃州得訃亟奔治葬事事且集以例告守制於朝會廣東叅政伍公孟賢在京師因請著事以屬東陽爲銘以掩諸幽時其先御史公諱洪死國難以遺衣冠葬於官山原已四十有三年至是合葬禮也初張氏世居安福之梅溪爲著姓而姚氏亦望於杉溪兩溪同里二氏之爲媼姪不絕孺人父諱某氏母某生而敏慎禮辨內外雖屬姻戚罕有一見其面者涉書史能解列女傳恪

奉婦職姑疾踰年躬進湯藥葬祭無違度御史公既取進士有官守劾姦糾慝不復顧家孺人獨任內政不貽外慮公按蜀有患其摧剝者挾賄入京師爲中傷計而官邸清肅無所投隙竟厄不行正統己巳公扈從至土木不克歸孺人日夜號慟聲徹衢巷後朝廷進錄死事賜恩封孺人左右進命服服以拜賜已而泣曰未亡人以遺孫故不能死誠不忍服是遂終身不復服携孤南歸日勤苦爲業遣就外傳嘗指公所誦書諭之曰此汝家世業汝父以汝輩遺我汝弗子我卽弗能母他日何用見汝父於地下後敷華以

公廕爲國子生繼舉進士累官布政使歷浙江湖廣  
孺人皆就養於官意甚樂然雖貴壽時親女事婢僕  
效職僚屬家亦有化者焉居湖三年忽思歸歸數月  
病革前數日謂諸孫曰汝父已得都御史行省我矣  
蓋其神爽不亂如此嗚呼古恒以忠臣烈女相配謂  
委質與致命之義同也御史公不辱於國而孺人不  
玷其身以成其家亦庶幾此婦不媿此臣也其固有  
所視傲然哉孺人壽八十生某某卒某某葬某子三某某  
女二適某某孫四某某因爲銘曰夫死國難婦死夫  
婦雖後死死不孤孤者旣壯榮弗枯先咷後笑非我  
圖圖用不辱爲道餘報歸地下同歡娛夫乎不愧汝  
與吾朔魂楚地歸來乎彼嬛弗終隳厥初朝擁荆壑  
暮羅孺生如繁葩死泥塗誰復此景收桑榆我徽懿  
行厥子於銘哉銘哉卒不誣

外姑宋夫人墓誌銘

嗚呼悲夫我外姑宋夫人之喪外舅蒙翁岳翁無一  
息之胤其伯氏處士公亦已壽終從子許又客於外  
病且革家具蕭然無以供後事者自脫簪制棺爲月  
制制甫畢而續屬决於是伯陸氏爲治喪從子均垣  
壙從孫子戶林及標格楫梁桂集相與奔走扶柩歸

鄆縣相於公墓東陽謹著銘刻石以內諸幽嗚呼我  
蒙翁之盛德大節所以遺其家者乃至此哉夫人陝  
之咸寧人世有顯者夫人生而莊肅通書能琴精女  
事厥考前知州翁擇婿得翁曰此天下士也遂歸之  
舅氏府君指揮公家甚盛姑劉夫人性嚴奉養惟謹  
正統末翁進士及第歷翰林編修修撰受知英宗以  
天順初元入內閣言曹石二家必反因得禍戍肅州  
夫人實從居五年宥還京師憲宗卽祚翁被召復爲  
修撰出知興化府夫人留京師翁旣致改當成化壬  
辰卒後二十年夫人壽七十有二乃卒蓋公素篤孝

友夫人志協力相不遺其憂翁竭節盡職不復顧私  
夫人貴不外溢處難不內懟翁重義博愛卹人之孤  
孫人之急日汲汲不暇夫人惟所命猶恐弗給若恒  
事常職未嘗畧有德色及孀居處獨拮据掇葺吃吃  
終其身而門閥屹立聲望不墜居常談翁所履歷及  
閨閣間語皆慷慨激烈得其義榮非負丈夫器識者  
殆不及此故公卿舊故多致盡敬里黨諸子皆有所  
做法焉夫人其賢哉夫人生子四人俱殤女六人某  
某內德嫿歸東陽爲繼室爲外孫者一惟東陽之子  
兆先而已嗚呼吾妻之亡兆先生甫四月夫人間謂

東陽曰吾欲見吾外孫之有婦也乃聘於吾友潘君  
時用之仲女夫人實相成之東陽繫朝藉不及赴葬  
遣兆先執紼行以某日葬夫人以編修貴被封曰孺  
人今稱夫人致私敬也銘曰婦德不必同惟厥從福  
履不必隆惟厥終厥終伊何壽則希有厥從伊何名  
以不朽嗚呼天乎竟何咎

封大安人楊母張氏墓誌銘

東陽與楊應寧爲知己二十年獲拜其母大安人數  
矣應寧爲按察司僉事提學山西大安人卒於官邸  
應寧書來徵銘曰一清俟此以葬因屬其門人禮部

主事喬寄爲狀翰林庶吉士闡价華繼刻石京師富  
而歸先公之喪應寧方以書弔我慰我今遠有是託  
予復惡能無情哉按太安人姓張氏大父爲湖廣九  
溪衛安福所官世居澧州太安人時爲處子方少閑  
內則應寧先公娶張繼劉皆早世念嘗爲澧州判官  
聞太安人家範甚習乃繼聘焉及歸劉安人遺女甫  
晬病幾死親提抱同卧起求良醫善藥而念之公自  
厲爲清白吏佐以勤儉及同知化州從居十年服節  
皆嫁時物處同輩金綺炫赫中晏如也州有劇寇城  
且陷僚屬家皆襁兒女爲走計太安人遣人覘公方



懷麓堂集  
乘城治戰具日無憂也治家事如常時諸家恒視以  
爲重卒無他變公本雲南人既謝官占籍巴陵太安  
人脫簪珥易布粟以爲日應寧應奇童薦奉公及太  
安人上京師及承詔讀書翰林舉進士公始棄養後  
拜官中書舍人三載考最例得給公勅命進階儒林  
郎太安人封六品號從夫貴也應寧滿九載待次疏  
乞歸雲南省祖墓畱太安人居鎮江既終祠谷族還  
始置田買屋宇爲常業太夫人實指畫之應寧得山  
西命重勞起居欲乞終養太安人不許許就養至期  
禮不通應寧不敢出巡太安人輒使行至平陽

病報馳還司太安遂不起是爲弘治戊申五月二十  
五日壽六十有三太安人敦重簡言笑祀事必恪禮  
處姻族馭賊獲無疾言怒色慈而能教京曹賓友以  
應寧故造訪踵接必豐饋食或聞應寧飲笑過度必  
婉語戒之小西學政久馳應寧力刻宿弊有無賴子  
披勢撓抗索治之幾斃杖下太安人間之愀然曰法  
固當爾顧人命亦至重爾父嘗言刑曹務平恕竟爾  
忘之耶應寧之文行一時樹立卓卓雖出父訓亦太  
安人教也初同知公病革念不能歸雲南巴陵僅係  
空籍而劉安人女適鎮江胡宗胤擬卜居鄰未果太

安人實命應寧葬於鎮江丹徒大山支之原始呂縣籍茲以九月六日啟窆而耐又嘗念應寧壯未有子命以雲南族兄續次子紹芳告公祠堂為冢嗣此五事皆功於楊氏故特誌之銘曰孤城岌岌桴鼓親執我從夫者以死殉急翼翼重闈命服有儀非子斯不孰我克馳我相夫勤誨子以慈而饗厥終孰謂耶宜其饗幾何勤則多有我廉其取以遺我後九原有知不我心負孰能我銘吾子之友

明故廣西布政司副理間致仕葉公墓誌銘

吳江鮑多水坎不能葬者必築甃石於其上其工

千百計凶事既不豫事多至倉猝不克固以為常患味葍葉公既老自營圖壽藏曰吾得從司空圖將足矣乃相吉壤於殿宇圍之原方事封築未竟而卒其子紳益築之踰年而後舉成先志也公諱方字子春世居吳江之汾湖湖多葍亢姓所嗜故以為說言大父仲賓九江府倉大使父蕙母鄭氏公性為前敏善記誦尤工屬對習詩經舉子業為縣學生而史彭公勗孫公鼎督學政每試必置優等試鄉闈屢不利以年當貢同學有徐文玉者母年老遂讓之又二年乃貢禮部入國監以例歸寧時怙恃既失與其

配居刻屬爲業又十有五年授廣西布政司副理問  
志存公恕實縣卒四人樵於谷皆坐濫罪久不決公  
疑之廉得實止罪其二二人獲免時稱爲明當川民  
林姓者以荒歲轉徙其田爲富民所業比歸不克復  
他官言田久無主非富民存之亦爲他人有矣公獨  
謂田本林產今其主故在惡得言無乃取其大半歸  
之富民以白金賂公欲盡得田公叱不聽在官幾九  
載無公私遺藉以老乞歸巡撫都御史朱公葵素善  
公使不輒聽懇乃得釋居家教禮義雖底富盛三子  
皆不仕恒飲然不以爲人鄰有爲不

戒之卒自感化鄉人稱之公年七十有六生其卒  
卜葬某子四紳其長舉於丁未進士爲戶科給事中  
有名孫七公夙勤子教念嘗誦於科目欲償取於後  
及見其子之成曰吾不憾矣今天子卽阼紳奉使南  
服期得歸覲弗及歛例復命於朝乃返襄事因奉狀  
請予銘且自述其葬地始末如此給事中例有封勅  
必滿三載始得拜姑銘此以俟諸他日銘曰汾湖葉  
公古達者年未髦期巡於野後十年餘葬茲土身所  
自營非手假生怡死安此其所生有令名沒不腐樵  
牧之輩安敢侮

明故南京工部尚書劉公墓誌銘

公姓劉氏諱宣字紹和一字應召其先世家南昌有諱君造者住南昌為吉州推官始畱居安福祖諱尚勤考諱祖昭俱贈大常寺卿公八歲而孤長值家難力就學受春秋於禮部侍郎李公紹正統丁卯補父成盧龍徒步學京師冬無纊手足皸裂忽凍死道上有老嫗飲以羹始甦夏嘗中暍有逋夫以熱土覆臍摘園瓜食之乃復進已巳北使假貢獻圖窺伺公上疏言不可信宜豫為備後六師失利公從武官守天津密贊戎事或誘之逃或畱妻以女皆弗聽事定乃

反景泰庚午例得校藝京闈巡撫都御史鄒公來學奇公才曰子必為解元聞者皆笑比試果一登第一名頌起辛未會試第九舉第二甲進士簡入翰林為庶吉士壬申授編修癸酉代祀北鎮丙子修寰宇通志成遷修撰天順戊寅歸省母彭淑人迎養於官庚辰同考會試壬午典京闈鄉試人服其公甲申憲宗卽祚命充經筵講官丁亥九載秩滿擢春坊右諭德尋以英宗實錄成遷右庶子庚寅擢南京大常寺少卿上疏請增置大廟實座更造進鮮服定樂舞生名數圖畫功臣諸廟數事多見采納丙申丁母憂巳亥

還任壬寅進本寺卿兼掌國子監事修正條教卹病  
賻死士類咸悅服琉球國遣子弟就學公據例請給  
薪米衣服撫之加厚學者奉束修金公辭弗受丙午  
召入爲吏部右侍郎學者復申前請事聞命公受之  
公在吏部每留意人才政務畢舉丁未早代祀北岳  
北鎮祀畢而雨弘治戊申今上皇帝特進左侍郎庚  
戌進南京工部尚書刻姦弊稽出納償官逋數千而  
羨倍之辛亥某月卒壽六十七公事母孝待寡嫂以  
禮鞠兄女有恩性耿直好折人過人亦以此重之尤  
熟本朝典故能歷數公侯世系成化初禮議慶成宴

尚書姚公夔誦公公歷舉舊制某官坐其所姚據  
以上奏行之至今爲文務理勝所著有冲澹集藏於  
家配王氏累封淑人子三長秉常以公蔭爲國子生  
次某某月日葬上遣官治葬弔且賜祭云東陽公  
京闈所舉士也故秉常來乞銘東陽其忍銘公亦何  
敢不銘銘曰六卿分職兩曹並舉公居南曹實掌邦  
土天子曰咨作我肱股乃身在外心實予輔諸吏奉  
法羣工信度天子曰都是咸在汝公在吏曹爲衡爲  
權公在太學有身有言文爲國華公在詞垣由終邇  
初亦罔不賢天之培之以歲以年國有耆舊若龜筮

然胡生之艱而弗其延我敘公行揚幽賁立誥命有章諭祭有文君恩在茲過者式焉

懷麓堂文稿卷三十

誌銘

明故朝列大夫雲南布政司左叅議致仕呂公墓誌銘

公姓呂氏諱昇字明遠世爲襄陽人祖諱義永樂初累功擢徽州衛副千戶贈明威將軍錦衣衛指揮僉事祖妣孫贈恭人考諱貴嗣千戶有寵英宗朝起擢錦衣衛指揮僉事後調貴州平越衛以功遷指揮同知階懷遠將軍懷遠公四子公年最長幼嗜學遊京庠從禮部侍郎刑簡翰林編修劉公昇受易學舉順

懷慶堂集  
天壬午鄉貢連得甲申進士第觀政吏部成化丙戌  
受戶部主事有勤慎聲庚寅疏乞省懷遠公於平越  
間歲乃反壬辰懷遠公卒率諸弟往歸其喪服闋遷  
員外郎丁酉運舟不時至命公往督官士奉令罔敢  
後己亥遷郎中會朝廷用師建州出督運餉餉不告  
乏辛丑竟典王府冊封副使癸卯擢雲南布政司左  
叅議至則躬親郡縣察隱除弊有武官怙勢殺人執  
法者欲賞之公曰死者何辜竟抵法民翕然稱快蒲  
蠻亂奉檄宣恩德皆帖服不敢肆公巡不擇地衝冒  
瘴毒因獲疾瀕殆乃起丙午入賀聖節事竣遂乞致

仕弘治戊申十二月四日疾作遽卒年五十七嫡母  
王封恭人生母李及配楊以公貴累封宜人子二某  
年日葬嗚呼予與公同庠同舉鄉貢及進士凡三十  
年聞政譽籍甚顧於詩未甚悉也比卧病公携五言  
數首過予使訂可否予見其帖有法度及詢之則曰  
吾業此二十年誦唐詩千首每袖置一卷有遺忘輒  
取繹之今尚能誦焉所作五七言亦無慮千首然未  
始示人聞子論甚強予意後數日當盡携以來過期  
不至忽報云死矣因取所留稿閱之慘然以悲又數  
日公弟錦衣千戶昂奉同年通政魯公克明狀以銘

懷麓堂集  
請予因以語昂俾輯遺稿俟異時次而傳之而先畀以銘銘曰生不溺貴當力學以成旋棄其羸以保此令名胡取之難而委之也輕乃以其餘自託於詩欲以是鳴志弗竟而止實傷我情有欲知公不於其詩其考我銘

明故監察御史張君墓誌銘

監察御史張君世用按福建時得疾還京師屢輟屢作猶力疾出治事今年春益劇乃具疏乞歸事下吏部未覆而君卒成化乙巳閏四月二十九日也年四十有九君屬纊時謂其子立曰吾親年七十吾不及

終養以死死不恨獨歎此耳又謂其中表弟尚寶卿仲君惟馨屬所以識其葬者蓋謂予予往弔君聞遺言而哀之翌日奉君同年中書舍人楊君應寧狀來請銘予以維馨故識君久且得應寧狀可據信銘不得辭君姓張氏諱稷字世用世爲楊之寶應人曾祖諱谷成祖仲仁父彥明封大常寺博士母鄭氏封孺人君少有器識弱冠爲縣學生穎脫儕類御史見其文驚曰是當爲場屋魁比試有司屢弗利成化戊子始卒鄉貢壬辰登進士第觀政戶部嘗預收京儲給河南潼關諸軍賞皆有能聲授大常博士凡值郊祀



廟饗左右執事閑禮度有白金文綺之賜居數年被  
簡爲四川道御史監光祿寺出納明慎及按福建樹  
風采嚴號令鋤強植弱敏於聽訟直判曲直然未嘗  
恃以爲能每錄重辟必勤服念所全活者甚衆有藩  
閩武臣怙勢爲民病君列其罪奏疏之名益彰尤重  
文教以作人厲俗爲事間又訪先賢遺跡興廢補敝  
存問其子若孫或弔古感物輒形歌詠亦不以妨政  
務及受代簿牘無畱者時官數多冗至有冒名匿罪  
以干祿澤君率同官極論之詔黜其尤者若干人君  
後別有擬奏而病已作竟不果上云君闔爽明達博

交汎受而臧否自別有不當意輒見辭色旋亦消釋  
不復着胸臆間憫窮赴急義氣所激視財利若土苴  
在官十餘年不問生業未嘗增寸土一屋服器儉朴  
蕭然如諸生時君當經術授徒京師有顯者爲詩文  
清拔有思致至於辨別體裁評騭高下尤介介不苟  
君子以爲知言所著有竹西稿若干卷娶許氏戶部  
檢校文誠之女封孺人一子某月某日葬某山之原  
銘曰入其堂其氣奮以揚接其人其論激以昂忽弗  
振而死能無傷乎

封承德郎刑部主事譚公墓誌銘

懷齋集  
封刑部主事上海譚公自作壽藏於黃龍浦之西原  
又自制棺槨衾襚凡後事皆備會其子員外郎韶歸  
自官公日引至其地左右指曰墓穴當主何山墓門  
當何鄉地當置何樹池畜何魚田所宜種者何穀園  
所藝者何物詔唯唯退而泣曰噫此殆以後事屬我  
也還朝而訃及公諱甫字廷禮世居上海鶴沙里年  
十六失怙出贅朱氏數歲乃歸養肄禮經舉子業志  
游庠校不果府強辟爲從事非其好也乃以經學授  
厥子曰必爲我成之間家居置塾爲鄉子弟師多所  
器就及謁選丞居野裁剴綜合見稱爲才以外艱返

載修塾教并繼母弟侃諤皆誨使成業焉納婦置產  
居之兄章裕死遺孤訓誨若已出潘氏妹勞無子迂  
歸養之改丞陽信專督馬馬政簡裕不爲力坐謗辭  
官詔舉鄉貢禮部試連得捷公曰吾不歸治家俾詔  
或內顧遷業豈至是哉於是益屏世營厭耳喧襍居  
浦西別墅築周垣鑿方池構屋數楹環蒔花竹日吟  
諷游衍以此自老及聞詔拜官昭以四戒謂急失情  
緩則留獄刻則妨平恕多疑則長奸僞因韻爲詩使  
誦之詔子魁兒早夭公貽書曰非我不德則汝失刑  
是致不可不省詔勘獄高郵時法禁殊肅公又示以

懷麓堂集  
詩贈王事至重母得枉道歸歸必請又一年乃用詔  
例以省覲歸三晦朔亟趣使行然中實不釋疾且作  
詔遷今秩公力疾手書致戒蓋自是不復至矣或者  
謂公曠達遺世樂不諱死此世所不易或曰久於命  
殆安之爾彼戒子者意懇懇不釋斃然後已此豈遺  
世者哉君子曰後說蓋知公者公曾祖伯玉祖文政  
者克閏配某氏子二詔其長也次子誥舉懷才未仕  
孫男女各二皆幼公年六十有二某日葬詔之舉於  
鄉予得其文魁選間及在官廉慎精法律以公命奉  
姑養於官卽所稱潘氏妹者也詔以刑部郎中陳君

一夔狀請銘一夔公鄉人有世好言蓋可據故爲銘  
銘曰名弗身遂於子則取之公不曰矜曰我國有之  
生距有窮意邇斯止公不外慕曰此足以死死有遺  
憂其憂在國曰吾子有職於我是塞彼官弗忒以耀  
於潛德

封大孺人楊母熊氏墓誌銘

楊大孺人熊氏卒於新都其子行人司正春奔喪歸  
旣闕地卜日具葬其孫翰林侍講廷和請予銘按楊  
氏之先本楚人元末徙新都春之曾祖諱賢贅於李  
祖諱壽山考贈行人司正公諱攻皆冒李姓公三娶

懷慶堂集  
始郭繼楊大孺人以同邑望族實再繼焉時楊氏中  
落公爲縣學生有前室二子遠政大孺人撫若已出  
及公膺貢入國學舊居故廬手自織辟畜鷄豚易錢  
谷爲朝夕費裁取自給餘悉致京師爲旅資公授永  
州吏目大孺人從歲所得祿奉務節縮一錢不妄費  
公卒於官遠改亦相繼夭死春及二季皆幼未堪事  
大孺人蓬骨垢面負遺骸挈兩寡婦以歸值貴州苗  
作亂道甚梗晨夜間行出入營壘觸冒瘴癘雖造次  
頃刻區別臧獲咸有分限每經一堡必號曰天乎未  
亡人經某堡矣經一嶺必曰經某嶺矣以至城郭津

渡皆然旣抵家治葬家復貧如未仕時脫所被簪珥  
遣春就學始令復楊姓曰汝父治命也日嘗失明成  
化辛丑春舉進士疏乞歸省大孺人喜乃復明居數  
年趣春就任曰我尚健猶幸及汝之封也春拜行人  
司正以弘治辛亥滿三載吏部上最績獲賜勅命贈  
公如其官大孺人始受封乃具冠帔拜祠堂曰未亡  
人有以見君地下矣某月日卒壽八十有三某月日  
葬於某山之原在公墓右數武許子五孫十廷和某  
其曾孫五銘必有狀司正君旣歸遺憶懿行懼外之  
人無能知勉自爲狀其辭哀而理廷和年十二舉鄉

懷麓堂集  
貢其舉進士實先司正君今在講筵史局卓然有聞  
焉予嘗敘貞壽堂詩以徵大孺人之教與澤然所敘  
事差簡茲敘爲銘作乃書之加詳若公行尚多以銘  
爲大孺人作故不及且與詩敘互見云銘曰有沃斯  
原我樹我封夫君所安我不圖存後四十年而窆於  
鄰異壙同垣疇其保之以遺我子孫

明故中憲大夫浙江處州府知府郭君廷臣墓

誌銘

予聞浙藩張布政稱良有司得知處州府郭君廷臣  
及彭彤部南巡最君績移檄獎厲處人相與建生祠

奉之未幾君卒其子鄉貢士郭方以憂居肥鄆馳省  
君至杭得訃奔至處處人曰我侯之子也相嚮而哭  
郭旣返君壙道鎮江奉楊按察應寧狀上京師請予  
銘蓋其母之葬予實銘之矣郭君舉成化己丑進士  
官戶部爲主事督收京儲會計精當尋督天津諸衛  
及汗石諸場財賦宿弊盡空屬吏以金餽斥弗納遷  
員外郎督儲臨清見伐桑棗貨食者畀之米且諭之  
曰植物不易貨且盡當復何貨民感悟遂不復伐會  
有議開邊者願君督餉辭不獲比出境不遇賊而還  
進郎中有宗室訟民田久不決君往勘實歸奏稱吉

懷麓堂集  
因疏所見數事於朝及知處州守久闕倅貳更署吏  
緣爲姦君至嚴防禁籍記條教事無畱案尤精判決  
人不敢欺處有銀冶民乘利據險爲恒患君榜示禍  
福弗悛者輒捕除之嘗有羣盜久弗獲君憂而禱之  
是夜夢衛廩穀溢因廉得米廣者爲盜窟併獲賊證  
衆以爲神麗水民惑後妻逐前室子君重傷子教反  
覆開悟俾爲父子如初戒民節用禁胥吏勿下鄉井  
還道民萬餘口復舊業歲旱禱雨雨輒應有蟲傷禾  
稼爲文祭之三日而死有瑞蓮嘉禾諸物或以頌君  
辭焉尤畱意學校躬爲程課士皆勸學獨嚴御下貪

官黷吏皆斂不敢肆惠歸於民民以是思之君少用  
志教養弟息舉鄉貢懋惠皆習舉子嘗旅宿比舍有  
女夜奔拒之不去乃出避之其素所操執固如此豫  
策民利數十事及爲郡次第行之處人輯所立教條  
曰爲政紀綱曰括蒼規約以傳其所自述有詩文若  
去卷郭氏本出鹿邑國初曾祖仁美從大兵北行至  
魁鄉因家焉祖晟龍江衛經歷父謙永年縣丞累封  
兵部員外郎今年八十矣母石氏累贈宜人君生某  
月日卒於某月日年五十有二娶梁氏累封宜人先  
卒葬某原己酉某月某日合窆郭其嫡子也側室楚

氏有子郭丁氏有遺腹子郭告諸祠堂名之曰郭銘  
曰世有毀譽或非厥情面背則殊矧惟死生浙有郡  
侯郭姓忠名蒞郡六年而棄其氓氓忘我侯侯我父  
兄劬孰我佚擾孰我寧泣以送之有淚吞聲侯也何  
知我情是嬰侯生有祠匪悅與營曷以驗之於侯之  
門有考績者視我茲銘

需菴處士岳公墓誌銘

亡妻岳宜人之伯父需菴處士公諱端字元方實爲  
吾外舅蒙泉翁季方之母兄卒且葬公子坪泣曰吾  
父之銘尚將誰屬哉東陽亦拉淚曰吾又奚辭因公

翁所撰述得公世系詢諸戚黨老長及坪所自述又  
追憶吾妻言得公事行并敘次之岳氏世爲順天涿  
縣人曾祖諱德甫祖諱思銘考諱興懷遠將軍府軍  
前衛指揮同知妣太淑人劉氏懷遠公始娶焉繼娶  
王劉娶於南京宣廟詢公家命舟迎至京師賜第居  
之懷遠公職秘甚近勤不顧私公孝友識理道少勤  
幹裕遠遊江湖服養成業翁賴以就學懷遠公從翁  
爲翰林編修嘗具疏論國大事辭甚激公窺見其稿  
泣且裂曰安所置老母乎及翁入內閣論曹石罪惡  
得祿成萬里外私第爲世家所奪家盡破公則曰弟

職然也未嘗色怨獨奉母日慰悅之終其身迨勢家  
敗公具自列憲廟命還故第翁出知興化公濁居慨  
慕及見致政歸方聚處數年而翁卒遺業蕭然幸公  
老壽家賴以不墜遇王人所生弟千戶詳從弟海皆  
極友愛育從子培均增室垣垣不異已出培子標再  
嗣官及諸孫及格植之立羣從中表諸女弟之嫁皆  
公力也族叔有餉邊者解所衣以贈之劉氏舅爲卒  
買棺治殮乃歸白懷遠公旁近媼黨下至旅寓以貧  
告爲治奩買棺者多不可紀數劉氏從母無子迎居  
母事三十年竟歿而葬之女適王主事證早寡撫育

其女擇貢士任經嫁之於今有孫焉家居不妄費不  
服統綺雖老病躬課臧獲或手操箕箒不少倦自制  
棺椁欽與凡後事曰死命也吾俟其正而已弘治丁  
酉四月三日病忽革匡坐而絕得壽七十九五月某  
日葬鄞之望村先墓配南京陸氏有賢行子坪克家  
孫梁女孫一人蓋自增堂之失我蒙翁遂失嗣續且  
不壽以沒天下其悼惜之公後卒十有八年壽踰二  
紀有子及孫視翁福祉殆若過之其功在繼續方居  
顯揚亦畧稱矣然則公之重以翁而亦可以無負也  
夫銘曰方以類聚習以性成古語則然於公有徵遠



則畿甸尊則公卿孰不曰此蒙翁先生之兄也漢有  
陳氏元季益稱公與蒙翁將無忝厥名有嗣在公來  
者其承之

西莊處士羅君墓誌銘

西莊羅公連昌南城人處士也其子祀爲翰林編修  
故大夫士多知公例得封勅不及命以卒鄉之人不  
敢字公故以號著曰西莊云公諱昌字文程生未晬  
失恃乳弗給日噉肉數鬻得不死竟以是得疾家人  
易之公考獨曰是將強吾宗願以疾弗督使學一日  
公忽自奮從季父大觀學博涉史經地志曆法諸書

未始圖然恒若以自負若人亦莫能測也正統間  
賊鄧茂七作亂聲言襲見昌城中人罔有固志公帥  
衆守西門不脫介冑示以固守力懲弛怠敲朴日不  
絕麾下士無敢仰視者忽流言將黥鄉兵軍中皆驚  
公叱曰敢譁者死衆乃定寇亦漸引去皆謝曰活我  
者羅公也村北芙蓉山傳有金鷄神能禍福人趨者  
踵接公曰寧有是敵以下皆笞而返之竟以無他嘗  
夜過東麓見灌莽中鬼燐匝地比曉揮百斧翦之遂  
屋其上今家焉其意氣屹屹不苟爲物變類此尤敦  
內行事父一日不離側祀事久益虔自撰墓奠親曰

禮禮非古吾以勸孝也晚居西莊置產增業爲遊眺  
所亭臺竹樹甲旁邑諸墅日與客笑傲其間竟以是  
終所著有西莊稿家塾稿若干卷娶傅氏子男四綱  
紀經維紀改名玘以國子生舉京闈第一登進士第  
拜今官公壽六十九某月某日葬縣之某原按羅氏  
出侍御史袍袍避危全諷跋扈徙居南城十一傳爲  
曾大父慶遠生闡谿司稅俊傑俊傑生耕隱處士大  
矩實生公至公子玘乃復顯方其未顯也公謂之曰  
爾有奇才終必稱吾志比久訕言不爲變已而果然  
玘舉京闈予實校其文故以公葬請予銘其同官陳

正之有狀銘曰鬱而崛其氣有勃歛其鐸弗剛以缺  
刪以發亦莫我敢遏固天將成之匪予奪

國子生傅君墓誌銘

國子生清苑傅君卒於家時其子編修珪方闋母服  
喜入翰林纔數月以冬至節謁陵未入見而訃至將  
復歸予甚傷之越數日珪奉檢討毛維之狀來請銘  
且曰吾母已得體齋傅先生銘吾父時以爲慰茲吾  
父不遇以沒先生倘予之銘是慰吾父地下蓋珪之  
舉於鄉予暨體齋典試事故其言云然予安可辭也  
哉族傅氏本清苑舊族最大鄉稱所居地曰傅家

莊曾祖諱士成祖諱貴皆弗仕考諱信爲嵩縣主簿  
有去思於民君諱泰字顯雅弱冠遊保定府學爲生  
通詩經學成同業皆推孫稱後進遂屈爲子弟執經  
問疑義者相繼君教法嚴整凡及門經指授多稱爲  
才君自負甚偉始謂科第可立取也試京闈連失利  
失利者類以藉口曰君道科目果足恃哉成化己亥  
膺府貢士上禮部陞國子生又卒業歷營繕司事名  
齒銓籍次未及問乞歸假君曰吾非不欲仕仕亦有  
命安能役志於物以累吾志乃自號抑菴散人放情  
田野日與鄉人則多蓄酒待客客至則冰釀爲樂任

措者亦忻然赴之性坦亮不喜談人過或犯之笑不  
與辨人以故樂觀之知君者謂雖自放然所負故在  
終必自見且其子珪已得進士官侍從卽不就仕亦  
嘗荷有錫命是其進退優裕無弗可者而君遽以疾  
卒得年五十有六而已君喜爲詩稿成亦輒棄去不  
復自惜每以教珪不獨於經學爲然珪志業專確將  
大有就而君不及見然他日考試業者寧不曰無是  
父無是子如楊子所云者亦可以無憾哉君配劉氏  
有內行其卒也以弘治庚戌葬府城南祖塋君卒以  
某月日明年某月某日啟壙而窆以劉氏祔焉子五

桂乃其長孫如子之數女孫加女之一皆在室銘之  
曰士有力學奮爲仕徒有車旣膏中阨於途塗亦孔  
夷衆所共趨我行獨起咎豈在車爲疾者驅我車弗  
如有命我者孰疾孰徐我悉聽之弗能覲覲我力弗  
窮而委其餘勗我繼軌慎哉厥功

先叔父前金吾左衛百戶李公墓誌銘

我叔父府君病間東陽之問曰有憂乎曰汝在予何  
憂有遺言乎曰汝在予何言嗚呼東陽辱愚賴我叔  
父以有今日自吾父學士府君之喪實父事焉叔父  
老而無子我其敢弗力凡葬事悉稱吾父顧名秩未

著不敢以銘誌爲達者累謹茹哀輟哭敘其事以藏  
嗚呼吾李氏世出茶陵洪武初吾曾祖繼一府君籍  
義兵歷濟南衛改燕山左護衛吾祖允三府君在永  
樂初與靖難功授小旗改金吾左衛尋入內局督工  
作正統間遭疾當代吾父欲棄學從事叔父年十六  
請行遂以書數受任器仗名籍奏牒辭式心計手錄  
雖宿吏老椽皆自以爲不及然悉力勤事戴星觸霧  
或遠涉江漢未嘗告勤成化初以上洪恩擢所鎮撫  
久之遷百戶弘治初例罷官而冠服供事終其身內  
領家政一不煩吾父躬所營置必以供俯仰費及東

懷慶堂集  
陽所得祿俸並聽出納勺粟寸帛兩無嫌猜四十年  
餘凡三陟七婚九表賓祭餽贈禮至無筭經制區析  
舉無遺憾其有勞於家又如此尤篤孝吾祖寢疾久  
扶掖甚至吾祖母陳宜人疾苦癱與吾父截葦筒吸  
之每談遺舊事至老猶相對泣下事吾母劉宜人及  
今母麻宜人莊不費禮張氏姑貧益甚養其夫子孫  
三世凡婚嫁視財利如土苴親黨中待以舉火者往  
往有之然實無原積當其揮金赴恙雖夜爨不給弗  
顧也是亦可謂難已初娶唐氏秀朗有內幹久不嗣  
內焦馬史三氏每得子輒不育長女唐出者嫁儀真

衛指揮同知張珏次出焦氏者嫁龍驤右衛副千戶  
王清皆蚤卒又次嫁府軍右衛副千戶張雄又嫁馬  
氏孤女於燕山左衛百戶喬峻叔父生宣德丙午五  
月二十五日沒弘治甲寅三月二十一日壽六十九  
歲視吾父猶不及一焉痛哉吾世墓自曾祖而下葬  
於城西畏吾村凡冢八唐叔母實在穆次四月二十  
六日東陽帥弟東溟男兆先輩治葬事墓去吾父所  
葬地三里而近東陽質居禮家謂宜合葬從祖不敢  
屈附新城獨念吾父叔兄弟之愛未始違朝夕而窀  
穸稍遠於情終不安嗚呼痛哉叔父諱澤字行潤不

懷齋堂集  
敢諱者爲來世計也

兒兆同理銘

見兆同者予第二子太子太傅成國公朱公之外孫也生僅十歲而殤悲夫兒生於成化丙午予隱几東閣夢人抱送一男心訝曰安得至此六月九日以生辰避客入直乃於舊所夢處得先學士公報始悟曰顧不至此乎予謂其同物且有奇兆也遂名之兆同云兒骨相奇聳目炯炯射人機穎驚脫五歲能作屬對語教之卽應口成誦口占俚句類協聲韻字雖未素識亦能闢寫累數十筆不少誤至於篆體亦然予

懼其洩露大早每爲抑遏之然逸不自制則肆爲諸幻戲剪刺描畫搏埴裝貼斂掣結縛百凡之事心得手應無事倣規而天真爛然超出意象卽物計數毫分兩析皆畧合算法予亦怪之然弗能禁也弘治甲寅春兒病頭痛至冬愈劇右臂旣萎猶能以左手貼梅花盈樹蓋自是始不獲作乙卯二月五日竟死其母嘗曰兒幼頗肥何漸瘦兒應曰木葉向長則展而不積此何怪又自言吾愛朝景花草竟發禽蟲下上殊愜人意然不可全得午日一照則萎矣嗚呼孰謂斯言爲終身之讖耶兒不擇服食獨自負俠伉不下

物間有所愛其母曰乞汝翁兒曰便乞無恥竟弗乞  
充其志殆無可以容之者其不克少見頭角以死正  
坐是哉造物者與人往往狎玩侮戲撓其志慮使不  
得其平不然有物如此曷不自秘惜徒費其技能而  
又棄之又何益也予旣思兒不置謂其有成人之志  
焉棺殮祭葬不忍殤視稍優其數以慰其有知者吾  
過矣吾過矣予以母命卜是月十八日帥其叔容之  
兄兆先葬兒都城西北小西門祔於祖墓之側慟而  
爲之銘銘曰孰夢我以祥孰畀汝以良而止於斯其  
生奚爲噫吁噉孰知我悲

